

## SchmuDo Willisau, 12.02.2015 (Vorstandsbericht)

Ize isches wider so wit gsi. Die lang ersehnti Fasnachtswuche het agfange. Am Morge simer früech ufgstange. Schminke isch agseit gsi. Träffpunkt 03:00 Uhr z Huttu bi Steffis Grossat, besser bekannt aus Plüsch Pöilu, im Chäuer. Und steuit nech vor, es het niemer verschlofe, Wäut ghei um. ☺

Nach eire Stung simer scho fertig gsi mit em Gringe amole. Tja ize geits haut no e Stung bis mir am 05:01 ufe Zug hei chönne. Zersch heimer aber no id Ribimatt müesse go d Instrumänt zum Ahänger us näh. Oh welch Freude es het no chli Bier im Ahänger. Guet we öpper uf Bier-Frapée steit, es het do so chli Bitzli drinne gha. Isch o nid grad warm gsi verusse aber bechlage heimer üs nid wöue es isch o scho chöuter gsi.

So d Reis mitem Zug vo Huttu uf Willisau-City isch normau verloffte und nid erwähnenswert. Z Willisau acho heimer üsi Sächeli packt und si aui schön usgstige, doch haut!! D Türe vom Zug si scho wider zue daser hät chönne witer fahre do het üsi Tampöse scho am Morge früech dr Schock vom Tag erläbt. „Haaaauuuuut!!! I ha d Trompete uf der Gepäckablag vergässe!!“ Phu schwein gha dr Zug isch auso no nid gfare gsi und het o schön gwartet, bis du zu guter letzt würklich aues isch a Maa gsi resp. Frou. Jo när heimer natürlich wie immer e Run gha ufe Kiosk. Es het do so einigi luschtige Chöif gäh wie immer. Was deu auso zum Zmorge näh... Vo Schläckzüg über Kaffi, Bier und Sandwitsch isch auso aues derbi gsi.

Nachdäm äui gepflegt si gsi, simer gäge d Autstadt füre glüffe und hei ufe Urknall gwartet. Die einzigi Prolematik isch haut gsi das Bläch u chaut nid so Kollege si. Es het äüä jedes „Blöserli“ s problem mit gfrohnige Vüntiu oder gfrohrne Züg gha. Aber o däm heimer bi de brönnende Fesser chönne Abhüuf gäh.

CHLEPF 🍷🍷🍷🍷🍷

Dr Morge-Bums isch ab. Bim mittlere Brunne heimer dä Schmudo iglütet. Mir hei öppe 5 Lieder gspiut und wie au Johr hei die 2 luschtige „Buebe“ derzue tanzet wie die Haub-Wüude. Es het freiechli lüt gha wonis zueglost hei. Nach üsem Uftritt isch eigentlich Schlag uf Schlag immer wider e angerei Gugge gspiut. Bis ufd Chrige, d Seline und ig si när aui l Beck ghocket bis mir am haubi 10ni dr nöchsch Uftritt hei gha. Mir jedoch hei dusse es huere Fescht gha und nid mou chaut. Me cha jo nid do stoh wiene Houzpflock wenn Gugge-Sound „louft“.

Üse 2. Uftritt, wider vorem mittlere Brunne, isch o guet verloffte. I ha wider mou d Periode im Gsicht gha, wie aui gäng so schön säge. Mir hei ziemlich viu Zuehörer gha wo freiechli gfanet hei. Heimer auso guet gemacht, nachdäm wider aui hei müesse Entschigs-Künscht awände. Gits äch do ke Entischer? (Marktlücke, sötti mou erfinge! ☺)

Ize si wider meh Sumpfers uf dr Gass gsi. Mir hei chli gsüüflet, natürlich im Mass, chame o 2-dütig verstah :-P, und eifach d Musig gnosse. Dr Gaugesumpfer-Tanz het natürlich o nid dörfe Fähle. Mir hei när am 11fi no üse 3. Uftritt gha. Isch eigentlich glich verloffte wie dä vorhär. Alles gut gegangen fänendi und feschtendi Lüt. Sitzt passt wackelt und hat Luft.

Am haubi 12fi simer du i stärke go ässe. Das mou het dr Haspi auso ke „Fisch“ is Säali gmacht. Mhhmmmm het das guet do. Es heis ömu äüä aui guet gfunge wüu so stiu isches süsch nie. ☺  
So nachdäm aui gässe hei gha simer du no chli go Guggene lose und scho gli richtig Bahnhof glüffe für när am Umzug teil z näh. Hmmm das eeewige warte immer. Zum Glück chame jo im Bahnhof-Kiosk go Feuer-Wasser choufe. S Tanja isch no zuenis gstosse bevor dr Umzug agfange het und ou Schiggu, Sandra und Dani si cho grüessech säge.

liiiiissttttoooooohhhh! Juhu es geit los. Mitem letschte Nr. simer du när o no dür Willisau uf glüffe. Es het auso vii lüt gha wo üs zuegluegt hei.

Dr letscht Uftritt vo däm Tag heimer no am 5fi im Zäut gha. Ou dä Uftritt heimer grockt. Aber heiss isches gsi dert inne auso. Jo nach däm Uftritt si es paari vo üs scho hei. Isch ou e länge Tag gsi. Paari si aber no blibe. Mir hei im Zäut no chli gsunge und gfeschtet und gsunge und gfeschtet und gsunge und gfeschtet...

Jo öppe am 9ni woni wider zrüg zu de angere ha wöue, i bi churz abkömmlig gsi, isch plötzlich niemer meh ume gsi. OK... hani do gseit und mit angerne woni kennt ha no eis gno.

Aus letschte Gaugesumpfer in Willisau hani mis Sousi packt bi a Bahnhof glüffe und 21:57 Uhr ufe Zug richtig Hei. Es isch e super Tag gsi und d Stimmig isch eifach Bombe gsi.

Müde und abengekämpft dohome acho ungers Wasser und när TV-Schlofe. Morn obe geits scho wider witter mit Fischbach. Mir wüsse zwar nüt aber gömer mou go luege. ☺

19.02.2015, Ste